

Ingoa: _____ Rangi: ____/____/____

Kia Tipu Tonu

nā Tipene Watson

Kahukura

Ka whakaatu mai a Koro i ētahi rākau nō te ngahere me ngā kōrero mō tēnā, mō tēnā. Nō muri ka kī mai ia, “Kia pai tā koutou moe i te pō nei. He mahinga mōrearea tā koutou āpōpō.”

I te ata ka kōrero mai ia mō te tipu e rongonuitia ana e Tūrongo rāua ko Māhinārangi. Ka rapu mātou i roto i te ngahere. Ka kite i tētahi raukawa nui me tētahi raukawa iti. Ka kōrero hoki ia mō tētahi tipu e kainga ana mō te maremare me te mate huangō. Ka rapu mātou. Ka kite i tētahi kūmarahou nui me tētahi kūmarahou iti.

Ka mihi mai ia, “Ka pai, mokopuna mā.” Ka kōrero ia mō tētahi rākau e kainga ana te hua e te kererū. Ka rapu mātou i roto i te ngahere. Ka kite i tētahi miro nui me tētahi miro iti.

Ka kōrero ia mō tētahi atu anō tipu i tāraitia ai hei waka i tērā atu rau tau. Ka rapu mātou i roto i te ngahere. Kātahi mātou ka kite i tētahi tōtara nui me tētahi tōtara iti.

Ka mihi mai ia, “Ka pai, mokopuna mā. Nā, e whā ngā tipu iti nei hei whakatō mā koutou. Kotahi mā tēnā mā tēnā o koutou.” Nā, ka whakatōkia ngā tipu e mātou, ka kī mai a Koro, “He pakiwaitara anō tāku mā koutou. Kia pai tā koutou moe i te pō nei, nā te mea he mahinga mōrearea anō tā koutou āpōpō.”